

INUIT ATAQATIGIIT

INATSISARTUNI



UPA16/48
13. maj 2016
Peter Olsen

Inatsisartut ukiakkut 2017-imi ataatsimiinneranni Naalakkersuisut, aallarnisaasunut suliffeqqanillu ingerlatsisunut, aningaaserivitsigut aqqudit naliginnaasut atorlugit attartorsinnaanngitsunut, annikittunik taarsigassarsisitsinermik ukiuni sisamani misiliinissaq anguniarlugu, Inatsisissamik saqqummiussinissamik peqquneqarnissaannik aalajangiiffigisassatut siunnersuut. Misiliinerup nalaani Aningaasanut Inatsimmi ukiut tamaasa siunertamut 500.000 kr.-nik immikkoortitsisoqartassaaq. Taarsigassarsiat killilimmik annertussuseqartassapput soorlu 20.000 kr.-iniit 100.000 kr.-inut. Inatsisissatut siunnersuummi ernialersukkanik taarseraanissamik periusissaq ilanngunneqassaaq, pisortat annaasaqarsinnaanerit killilersimaarusullugu. Tamatuma saniatigut Inatsisissatut siunnersuut misileraanerup naanerani nalilersuinissamik piunasaqaammik ilaqassaaq.

(Inatsisartunut ilaasortaq Naaja H. Nathanielsen, Attaviitsoq)

Oqaluuserisassaq qulaani pineqartoq matumuuna Inuit Ataqatigiinniit imatut oqaaseqarfigissavarput.

Siullermik Naaja H. Nathanielsenimut qujanarujussuaq uunga oqaluuserisassamut soqutigintartumut pissanganarluinnartumullu.

Suliffeqarfeeqqanik aallarnisaarusuttunut saaffigineqarsinnaasut, tapiiffigineqarnissamulluunniit qinnuteqarfigineqarsinnaasut, ullumikkut pioreersut, aallarnisaarusuttunut qinnuteqarfiginiarlugit ajornapallaalersimapput – naleqqukkunnaarsimappullu, Naaja H. Nathanielsen taama isumaqarpoq.

Taamatullu isumaqarnera Inuit Ataqatigiinniit isumaqatigaarput.

Naak nunatta inuussutissarsiornikkut ineriartortitsinermik ingerlatsiviata – Greenland Bussines-ip 2014-mi naatsersuutaani takuneqarsinnaagaluartoq qiortartakkat aqqudigalugit tapiissutigineqarsimasut 466.000,- iusut aammalu tunisassiassanik ineriartortitsinissamut 1.936.000.-it atorneqarsimagaluartut, taamaattoq aamma paasitinneqartarpugut suliffeqqanik aallartitsiniaraluartut arlalippassuit qinnuteqartaraluarlutik itigartinneqartartut.

Tamanna uggornarpoq ajuusaarnarporlu. Taamaattoqarsimappat taava paaserusunnarsinnaavoq tamanna sumik peqquteqarnerisooq. Suliffeqarfeeqqamilli aallartitsiniaraluarlutik amerlasuut qinnuteqaraluarlutik itigartinneqartarsimappata, taava tamanna arlaanik peqquteqarsimassaaq, Greenland Bussines-illi ukiumut naatsersuutaani 2014-meersumi tamanna ajoraluartumik takuneqarsinnaanngilaq, kikkut akuerineqarsimanersut, kikkulluunniit itigartinneqarsimanersut.

Taamaammatt taamaallaat isumaliutersuuteqaannarsinnaavugut, taamaattumik...

Isumaqarnarsinnaavoq suliffeqarfeeqqanik pilersitsiniartunut, mikro iværksætterit aamma taaneqarsinnaasunut immaqaa Greenland Business pisariuallaalersimanerpa? Allaffissorneruallaalersimanerpa? Piunasaqaatit qeratavallaalersimanerpat? Eqarpallaalersimanerpa pisariuallaarlunilu? Naleqqussaasoqartariaqalinnginnerpa?

Taamatut isumaqarnarsinnaavoq.

Taamaattumik Inuit Ataqatigiinniit Naaja H. Nahianielsenip, suliffeqarfeeqqanik aallarniiniartunut ullumikkumut naleqqunnerusumik, tulluarnerusumik, pisariinnerusumillu immikkut ittumik atorniartarfiusinnaasumik pilersitsisoqarnissaanik siunnersuutaanut isumaqataavugut.

Aningaasaateqarfinnguaq taanna, aningaasanik qinnuteqarfiusinnaasooq pilersikkutsigu, taava assersuutigalugu aallarnissaarniartunit makkunanga qinnuteqarfigineqarsinnaalissagaluarpoq:

Ujaqqanik erlinnartunik pinneraasiortunngorusuttunit, sanaluttartunngorusuttunit, kulturikkut ingerlatsivimmik pilersitserusuttunit, soorlu filmiortartunngorusuttunit, immiussisartunngorusuttunit, nipilersortartunngorusuttuniillu. Assersuutaannaapput taakkartorneqartut, immaq suli allarpassuaqarpoq utaqqiinnartunit, qallunaat oqariartaasiat malillugu takorluisinnaanerup taamaallaat tamanna killilersinnaavaa. Nunarput inuusuttunik pikkorissorpasuarnik ulikkaarpoq nutaaliorusuttunik, aningaasaateqarfimmillu pilersitsinitsigut inuusuttut aallarnissaarusuttut pitsaasumik periarfississavaatigut.

Siunnersuummi ersarippoq siunnersuut ukiuni sisamaannarni misiligutaannaassasoq, taassumalu kingorna aqqissuussineq naliliiffigineqassalluni. Iluatsippa? Iluatsingila? Iluatsissinnaassappalli qanoq nuannertigissagaluarpa?

Aningaasaateqarfinnut ullumikkut pioreersunut ilapittuutaalluarsinnaanera Inuit Ataqatigiinniit takusinnaagatsigu iluarisimaarparput, ukiullu sisamat qaangiuppata naliliiffigineqarnissaa Inuit Ataqatigiinniit naammagisimaarlutigu.

Suliffeqarfeeqqanik pilersitsiniartut atorniartarfigisinnaasaannik pilersitsineq aallarnissaasartunut tamanna annertuumik oqilisaataassaaq, minnerunngitsumillu nunatta aningaasarsiorneranut, suliffissaqartitsiniarnermullu annertumik iluaqutaallualersinnaanera Inuit Ataqatigiinniit qularutiginnilarput.

Naak Naalakkersuisut siunnersuuteqartumut akissuteqarnerminni Nordisk Investeringsbank, Europæiske Investeringsbank aamma Danmarkimi Siuariartortitsinermut aningaasaateqarfik (Vækstfonden i Danmark) periarfissaareeraluartut assersuutitut ilanngukkaluaraat, uanga tamanna oqaaseqarfigissanngilara, tupigutsannanngitsuunngilarli periarfissatut ilaattut aningaasaateqarfissuit taakku Naalakkersuisunit periarfissaasinnaasutut ilaattut tikkuarneqarsimammata, aningaasaateqarfiimmi qulaani pineqartut suliffeeqqanik aallartitsiniartunut naleqqutinngilluinnartuupput, atorsinnaanngilluinnarlutillu.

Kisianni ajunngilaq tamakku pinngilagut aamma aporfigissanngilavut:

Suliffeqarfeeqqanik aallartitsiniartut qinnuteqarfigisinnaasaannik ingerlatsivimmik pilersitseqatigi-inniarta. Pilersitsigutta taava:

Ujaqqanik pinneraasiorneq ineriartortissavarput, sanalukkanik tunisassiorneq ineriartortissavarput. Kulturikkut pikialaartitsiviusunik pilersitsiortussaagut. soorlu filmiorniikkut, immiussisarfeqarnikkut nipilersorniikkut allarpassuartigullu. Taava imminut pilersorneq aningaasarsiornerlu qaffakkiartulissapput.

Aningaasaliissutit aningaasaliissutaalluassapput, aningaasarsiornermik suliffissaqartitsinermillu pilersitsissapput. Aningaasat imminut akilissapput uteqqissappullu.

Inuit Ataqatigiinniit taamatut oqaaseqarluta, Naaja H. Nathanielsenip siunnersuutaa taperserlugu ataatsimiisitaliamut ingerlateqqipparput.